

- 30 men dat enmóste Bellin nicht wetten,
dat Lampen hœvet dâr inne stak.
hê gink tó Bellin unde sprak
'sêt, henge den renzel an jûwen hals,
unde ik vorbêde jû als unde als,
- 35 up dat ik jû nicht bidde vorgeves:
nicht schole gi besên dē schrift des brêves,
wente desse brêve hebbe ik alsô
vorwaret, dâr umme lâtet sê tó.
gi mœten ôk nicht den sak updôn,
- 40 sô werde gi vordēnen schenke unde lôn,
wan it dē konnink sô heft gevunden,
dat dē renzel is tógebunden
in sôdâner wise also ik ene jû
hebbe gedân tó vorwarende nû.
- 45 hœret mî recht, it wert jû vromen,
sô wan gi vor den konnink komen.
wil gi dat hê jû schal hebben lēf,
sô segget, dat gi sulven den brêf
dichteden unde hebben gegeven
- 50 den rât, dat hê sô is geschreven:
gi krigen lôn unde grôten dank.'
Bellin wart vrôlich unde sprank
van der stede dâr hê stôt
hœger dan anderhalven vôt
- 55 unde sprak 'Reinke, neve unde hêre,
nû wêt ik dat gi mê dôn êre.
nû werde ik krigen sêr grôten lof
bî al den hêren in deme hof,
wan sê sên dat ik sô wol kan dichten
- 60 in schônen wôrden unde in slichten.
wô wol dē kunst nicht is bî mî,
dat ik kan dichten sô wol also gi,
sê scholent doch mēnen. ik danke jû gërne.
it was gût dat ik jû volgede sus vërne.
- 65 nû wat råde gi vörder, Reinke vrunt:
schal Lampe ôk mede gân tó desser stunt?'
'Nên' sprak Reinke, 'wil gi it vorstân,
Lampe kan nôch nicht mit jû gân.
nû gût vorhen in gûdem gemake.
- 70 ik wil Lampen noch etlike sake
updecken dē noch sin verholen.'
Bellin sprak 'sô sit gode bevolen.
ik gâ hen up mine vârt.'
sus hastede hê sêr tó hove wart.

34 vorbêden, verbieten. — als unde als, durchaus. — 35 vorgeves, vergebens. —
69 in gûdem gemake, langsam, gemächlich. — 74 tó hove wart, nach Hofe zu.